

KKM jemput MMA untuk sesi libat urus lanjut

Perbincangan babit isu pameran harga ubat sektor kesihatan swasta

Putrajaya: Kementerian Kesihatan (KKM) akan mengadakan satu lagi pusingan perbincangan dengan Persatuan Perubatan Malaysia (MMA) dan badan perubatan lain, berikutan bantahan terhadap langkah melaksanakan Akta Kawalan Harga dan Antipencatutan 2011 (Akta 723) terhadap fasiliti penjagaan kesihatan swasta.

Menteri Kesihatan, Datuk Seri Dr Dzulkefly Ahmad, berkata beliau akan mengkaji kebimbangan dibangkitkan dan berunding dengan pihak berkepentingan mengenai perkara berkenaan.

"Saya baru sahaja dimaklumkan mengenai isu itu (lapan persatuan perubatan membantah arahan pameran harga).

"Saya akan segera menyasiat dan mengadakan perbincangan lanjut.

"Saya bersedia mendengar, terutama selepas mesyuarat mereka semalam. Saya sekali lagi menjemput MMA (dan persatuan lain) untuk perbincangan lanjut mengenai hal ter-

kait dengan pameran harga ubat," kata selepas majlis penyerahan 210 unit *Automated External Defibrillator* (AED) sumbangan 99 Speedmart Sdn Bhd di sini, semalam.

Pada 7 April lalu, lapan persatuan perubatan, termasuk MMA dan Persatuan Gabungan Pengamal Perubatan Malaysia membantah langkah menggunakan Akta 723 terhadap sektor penjagaan kesihatan swasta.

MMA dilaporkan berkata, penggunaan Akta 723 itu juga tidak dilaksanakan secara seragam seperti sektor lain yang sudah diletakkan di bawah akta berkenaan dan ini suatu bentuk penyalahgunaan kuasa serta beban yang tidak wajar.

Papar harga ubat

Sebelum ini, dilaporkan hospital dan klinik swasta akan memaparkan harga ubat-ubatan di fasiliti mereka mulai 1 Mei depan, selaras dasar ketelusan harga dalam perkhidmatan kesihatan.

KKM sudah mengadakan beberapa pusingan libat urus khusus dengan MMA dan Pertubuhan Doktor-Doktor Islam Malaysia (PERDIM) dan bersetuju perkara terkait dengan Jadual Ketujuh Akta Fasiliti dan Perkhidmatan Penjagaan Kesihatan Swasta 1998 (Akta 586).

Mengenai Rang Undang-Undang (RUU) Penjualan Pra-Hospital, Dr

Dzulkefly berkata, ia dijangka dibentangkan di Parlimen selewat-lewatnya awal tahun depan.

Katanya, proses penggubalan RUU itu sedang dilakukan, termasuk cadangan elemen *Good Samaritan Law* bagi melindungi orang awam yang memberi bantuan kecemasan daripada implikasi undang-undang.

"Perkara ini saya (advokasikan) dari penggal pertama lagi dan kami sedang melihat kepadanya.

"Bahagian Perkembangan Perubatan, KKM dan Bahagian Hal Ehwal Undang-Undang (BHEUU) (melihat) bagaimana kami boleh menggalakkan orang awam yang mempunyai kemahiran diperakui berani ke hadapan untuk membuat intervensi menyelamatkan nyawa pada waktu kritikal.

"Kami berharap RUU ini akan dibentangkan hujung tahun ini atau awal tahun depan," katanya.

Sementara itu, Dr Dzulkefly berkata, KKM menggalakkan pemasangan AED di kawasan awam sebagai usaha kesiapsiagaan komuniti, selain memastikan kemudahan itu mudah diakses apabila berlaku kecemasan.

"Kajian menunjukkan AED dalam tempoh tiga hingga lima minit selepas serangan jantung, boleh meningkatkan kadar kelangsungan hidup antara 50 hingga 70 peratus," katanya.



Dr Dzulkefly dan Ketua Pegawai Operasi 99 Speed Mart Sdn Bhd, Yong Eng Kwang (dua dari kanan) pada majlis penyerahan mesin AED di Putrajaya, semalam. (Foto Mohd Fadli Hamzah/BH)